

BARNABASI, PESA NZILA!

Baleso 2

Muntu ya me sonika lesu yai Mama Lorella Rouster, MCE

NB sambu na lesu yai : Baleso yai landa luzingu ya muntu beto binga Barnabasi. Bonso yo kele ndaa, beto lenda kabisa yo na baleso zole. Yo kele na bitini 15 yonso, ebuna mbote kulonga bitini 1-8 mposu ya ntete, bitini 9-15 mposu ya zole. Nge lenda sadila verse mosi ti kikuma mosi sambu na beleso yina zole, kiteso mosi na bankunga. Awa na MCE, beto ke samba ti nge nde bana na nge ta kuma bankwa-encouragement bonso Barnabasi. Nzambi sakumuna beno!

Kikuma ya Leso:

Lesu yai kele kulonga mwana ya me zaba Yesu nde yandi mosi kele mfunu mingi na meso ya Nzambi. Kana nge me manisa kulonga, konso mwana fweti zaba nde yandi fweti ve kuvanda muntu ya ntete to champion. Yandi lenda vanda kiese na konso kisika to kisalu Nzambi ta pesa yandi.

“Barnabasi, Pesa Nzila!” yantika na histoire mosi ya nkufi ya ke songa mwana-bakala ya zolaka kubaka kisika ya ntete na théâtre, kansi yandi bakaka sika yina ve. Leso ya Bible kele histoire ya muntu ya Bible Barnabasi. Yandi vandaka muntu ya kwikama mingi, kansi mbala zole, Nzambi pesaka yandi sika ya zole, kusadisa muntu ya nkaka.

Histoire ya Bible: Bisalu 4:34-37; 9:20-28; 11:19-30; 12:25; ti bakapu 13-15 ;
2 Timothée 4:11.

Verse kulonguka na ntima: “...konso muntu ta baka makabu na yandi bonso mpila yandi me sala. Sambu beto yonso kele kusala na kimvuka ti Nzambi...”
(1 Korinto 3:8b,9a).

Kulonga verse yai, bana yonso lenda tuba yo mbala zole. Konso mwana meka kutuba to kutanga yo na ndinga ya nkaka—na zulu, na nsi, etc. Na nima, nge yula bangyifula ya kele na nsi (1-5, mosi-mosi), ti sola mwana mosi. Yandi tuba verse to tanga yo na carte.

Konso mwana fweti tula accentuatio to ngolo na bandinga ya verse ya songa mvutu na ngyifula yina.

Songa bana, “Verse na beto ke songa beto mambu mosi sambu na bakristo. Keti nge ke zaba inki kele disongidila ya ndinga yai, “mukristo”? (*Longi, kinga fioti sambu bana yindula.*) “Mukristo kele muntu ya me yamba Yesu Kristo bonso Mvulusi na yandi, ebuna Yesu me sukula yandi na masumu.” Mono ta lomba mwana mosi kutuba to kutanga verse na beto. Kuwa mbote, ti meka kumona mvutu na ngyifula ya mono ta yula.

1. Bakristo ikwa ta baka makabu ya Nzambi?
2. Sambu na inki konso mukristo ta baka makabu?

3. Beto sala to sadila na kimvuka ti nani?
4. Keti Nzambi ke mona mpila beto ke sadila Yandi?
5. Keti beto fweti vanda muntu ya ntete sambu na kubaka makabu ya Nzambi?

Na nima, meka kutula verse yai na nkunga ti yimba yo ti bana.

Bankunga ya nkaka: Yimba bankunga ya bana ke zaba ya ke tuba sambu na “Kusadila Yesu”, bonso:

MONO KELE NA NZO KITOKO

Kisalu mingi kele awa
Pema kuna
Kisalu mingi kele awa
Pema kuma
Kisalu mingi kele awa
Pema kuna
Kuna na zulu

Mvutu: (O Nzambi)
Mfumu, O Mfumu
Mono ta tonda nge (3x)
Kuna na zulu

Kuyantika:

(Histoire) Mwana zina ya Lali bakaka ntinu kukwenda na nzo-Nzambi. Dibundu na yandi zolaka kusala théâtre ya nene. Nkokila yai, Pasteur zolaka kusonga nani ta baka kisika ya ntete na théâtre yina.

Lali monaka banduku na yandi. “Keti Pasteur kele awa?” yandi yulaka.

“Ee,” banduku na yandi vutulaka. “Yandi kele na kati ya nzo-Nzambi. Kansi yandi ta songa ve nani ke baka inki kisika na théâtre tii ntangu ya bana yonso me kwisa.”

“Mono fweti baka kisika ya ntete,” Lali tubaka. “Ata muntu mosi ve salaka mbote bonso mono. Mono salaka mbote mingi. Nge banza mutindu yina, Muntu Mosi?”

“Nge salaka mbote. Ndambu,” Muntu Mosi tubaka.

Bana yonso vandaka kusala makelele mingi. Pasteur kingaka sambu bo vanda pima. Na nima, yandi tubaka.

“Ntete, mono zola kutonda beno yonso sambu beno me vanda na ntima ya mbote kusala konso yina ta sadisa, sambu théâtre yai kusalama na mpila mosi ya mbote. Beno yonso me sala mbote. Kana théâtre yai ta salama mbote, beto ta vanda ya mfunu ya lusadisu na

misiki mpi. Beto me meka kutula konso muntu na sika ya yandi lenda sadila bamakabu na yandi.

Partie ya ntete, ya Noah, beto me pesa na Muntu Mosi, partie ya Jafethi beto me pesa na Joele, partie ya Semi beto me pesa yo na Kongolo, Partie ya Kami beto me pesa na Mpasi. Lali, beto ke na mfunu ya nge kusadisa na misiki.”

Lali vandaka na makasi mingi. Yandi bakaka ve partie ya Noah. Zina na yandi, Pasteur tangaka yo na nsuka ya bantu yonso. Yandi monaka nsoni. Yandi tubaka kima ve, kansi yandi basikaka nswalu.

Bana, inki nge banza vandaka na ntima ya Lali? Sambu na inki nge banza Pasteur lombaka yandi kusadisa na misiki? Sambu na inki nge banza Lali zolaka kusala partie ya ntete—partie ya Noah? (Longi, bana lenda solula mambu yai fioti.)

Bantu yonso lenda ve sala partie ya ntete. Mbala mingi, yo kele mpasi kusala na sika ya bantu mona nge ve. Kansi mbala ya nkaka, sika ya zole, to sika ya tatu, to sika ya iya, lenda vanda sika ya Nzambi lenda sadila nge kuluta mbote.

Transitio kukota na lesu ya Bible:

Mono ke yindula muntu ya beto mona na kati ya mukanda ya Bisalu ya Bantumwa. Mbala zole Nzambi lombaka muntu yai kubaka kisika ya zole. Yandi vandaka Muyuda mosi zina ya Yozefi. (NB : Yai kele ve Yozefi ya mukanda ya Kuyantika, ti yo kele ve Yozefi ya kwelaka Maria, mama ya Yesu. BaYozefi kele mingi na Bible, ti yai kele Yozefi ya nkaka.) Beto landa luzingu ya muntu yai Yozefi, kana yo lenda longa beto inki:

Bangindu ya nene na Lesu ya Bible:

1. Lubutuku ti kubalula ntima ya Yozefi

1A Kutanga: *Bisalu 4:36*

36 Kuvandaka na muntu mosi, zina na yandi Yozefi, yina ya bantumwa vandaka kubinga mpi Barnabasu (disongidila nde “muntu yina ke pesaka bantu kikesa”). Yandi vandaka muntu ya dikanda ya Levi, yandi butukaka na kisanga ya Shipre.

1B Kuyula bana:

Niveau Primaire:

- Yozefi butamaka wapi? (Na kisanga ya Shipre)
- Bambuta na yandi vandaka bantu ya inki tribu? (Dikanda ya Levi. Yai vandaka tribu ya banganga-Nzambi ya Kuwakana ya Ntama.)

Niveau Secondaire:

- ✓ Ata Yozefi butamaka na kisanga ya Shipre, ntangu beto mona yandi ntete, yandi me kuma na Yeruzalemi, ti nani ke zaba yandi? (Bantumwa)

- ✓ Bantumwa vandaka kubinga Yozefi inki? (Barnabasi, to muntu yina ke pesaka bantu kikesa).
- ✓ Sambu na inki nge banza bo pesaka Yozefi zina yina? (Yandi vandaka na kati ya bakristo na dibundu, ti yandi vandaka kupesa bantu kikesa na kisalu ya Nzambi.)
- ✓ Bible ke songa beto ve inki ntangu Yozefi waka nsangu ya Yesu ntete. Keti nge lenda songa bantangu ya nkaka ya bazwif balulaka ntima na Yesu? (Trois milles ndimaka Yesu ntangu Ntumwa Pierre samunaka na lumbu ya Pentecote. Yo lenda vanda mpi nde Pierre, to Yoane, to mulandi ya nkaka ya Yesu songaka Yozefi inki mutindu Yesu lenda sukula yandi na masumu yonso.)

1C Participatio ya bana:

Tuba na rythme—“Bar-na-ba-si! Nwka-encouragement!” (Repeter.)

Na nima, yika ton ti yimba yo mutindu yai:
Barnabasi vandaka Nkwa-encouragement! (Repeter.)

2. Yozefi tekaka ntoto na yandi sambu na kusadisa bakristo ya vandaka kumona mpasi.

2A Kutanga *Bisalu 4:34-37*

34 Ata muntu mosi ve na kati na bo vandaka nsukami, sambu bantu yonso yina vandaka na ntoto na bo to na banzo na bo, bo vandaka kuteka yo, bo vandaka kwisa kunata mbongo ya bima yina,
35 ebuna bo vandaka kupesa yo na bantumwa. Bo vandaka kukaba yo konso muntu mutindu ya yandi vandaka na yo mfunu.
36 Kuvandaka na muntu mosi, zina na yandi Yozefi, yina ya bantumwa vandaka kubinga mpi Barnabasu (disongidila nde “muntu yina ke pesaka bantu kikesa”). Yandi vandaka muntu ya dikanda ya Levi, yandi butukaka na kisanga ya Shipre.
37 Yandi vandaka na kilanga mosi, yandi tekaka yo, ebuna yandi kwisaka kupesa mbongo na bantumwa.

2B Kuyula bana mutindu yai:

Niveau Primaire :

- Sambu na inki Yozefi tekaka ntoto na yandi ya kilanga ? (Sambu bantumwa lenda sadila yo kusadisa bakristo ya vandaka na mfunu ya madia.)
- Yozefi pesaka mbongo yina na nani ? (Bantumwa, ya vandaka bonso bantwadisi ya dibundu.)

Niveau Secondaire :

- ✓ Inki vandaka mabanza ya bakristo yai sambu na bima na bo ? Inki vandaka mabanza ya Yozefi ? (Bo monaka bonso konso kima bo

vandaka na yo, yonso vandaka kaka sambu bo sadila yo kusadisa bakristo ya nkaka.)

- ✓ Sambu na inki bansukami vandaka ve na kati ya bakristo? (Sambu bo yonso vandaka kusadisana.)

2C Participatio ya bana: Bana yonso na kimvuka sala théâtre bonso bo ke teka ntoto ti baka mbongo. Na nima, bo yonso sala bageste bonso bo ke pesa mbongo na bantumwa sambu na kusadisa bakristo ya nkaka.

3. Barnabasi pesaka kikesa na Saule

3A Kutanga *Bisalu 9:26-27*

26 Ntangu Saule kumaka na Yeruzalemi, yandi mekaka na kwenda kuvukana na bakristo. Kansi bo yonso vandaka kutina yandi boma, sambu bo kwikilaka ve nde yandi kele mukristo ya kieleka.

27 Kansi Barnabasi kwisaka kusadisa yandi, yandi nataka yandi na bantumwa. Barnabasi zabisaka bo mutindu Saule monaka Mfumu Yesu na nzila. Yandi zabisaka bo mpi mutindu Mfumu tubilaka Saule, ti mutindu Saule vandaka kulonga na kikesa na zina ya Yesu na Damasi.

3B Kuyula bana mutindu yai:

Niveau Primaire

- Barnabasi sadisaka nani na Yeruzalemi ? (Saule)
- Yandi sadisaka Saule inki mutindu? (Pesaka kitemwe na meso ya bantumwa inki mutindu Saule longaka na kikesa na zina ya Yesu.)
- Sambu na inki kitemwe yai vandaka mfunu? (Sambu bakristo na Yeruzalemi kwikilaka ve nde yandi me kuma mukristo ya kieleka. Ebuna, bo vandaka na boma sambu na yandi, sambu ntete yandi vandaka na kufwa bakristo.)

3C Participatio ya bana: Sala théâtre ya kitini yai ya histoire. Mwana mosi lenda vanda Saule, mwana mosi Barnabasi, bana tatu bantumwa. Bana ya nkaka ta vanda bakristo ya Yeruzalemi. Songa mpila Barnabasi pesaka kiteme sambu na Saule.

4. Dibundu tindaka Barnabasi kusiamisa bakristo ya mpa na cité Antioshe.

4A Kutanga : *Bisalu 11:19-24*

19 Na nima ya lufwa ya Etienne, bo vandaka kumonisa bakristo mpasi. Yo yina bakristo panzanaka. Bankaka kwendaka tii na ntoto ya Fenisia, na kisanga ya Shipre ti na bwala Antioshe. Bo vandaka kuzabisa Nsangu ya Mbote na Bayuda kaka, kansi na bantu ya nkaka ve.

20 Kansi na kati na bo kuvandaka na bantu ya nkaka ya Shipre ti ya bwala Sirene. Ntangu bantu yango kumaka na Antioshe, bo yantikaka kuzabisa mpi Nsangu ya Mbote ya Mfumu Yesu na bantu yina kele Bayuda ve.

21 Ngolo ya Mfumu Nzambi vandaka ti bo, ebuna bantu mingi kumaka bakristo.

22 Bantu ya dibundu ya Yeruzalemi waka nsangu na bo, ebuna bo tindaka Barnabasi na Antioshe.

23 Ntangu yandi kwisaka kukuma kuna, yandi monaka inki mutindu Nzambi sakumunaka bo, ebuna yandi monaka kiese mingi sambu na mambu yina.

24 Barnabasi vandaka muntu ya mbote. Yandi vandaka ya kifuluka na Mpeve ya Nzambi ti na lukwikilu. Bantu mingi kumaka bakristo.

4B Kuyula bana mutindu yai:

Niveau Primaire

- Inki salamaka na bakristo na nima ya lufwa ya Etienne? (Bo monaka mpasi.)
- Ntangu bantu ya Shipre ti Sirene kwisaka na Antioshe, bo yantikaka kusonga nsangu ya mbote na nani? (Na bantu ya vandaka ve Bazwif)
- Dibundu ya Yeruzalemi tindaka nani sambu na kusadisa bo? (Bo tindaka Barnabasi.)
- Barnabasi vandaka kifuluka na inki? (Na Mpeve ya Nzambi)
- Inki vandaka nsuka ya kusalu ya Barnabasi? (Bantu mingi kumaka bakristo.)

Niveau Secondaire

- ✓ Sambu na inki kusalu ya kusiamisa bakristo ya mpa kele kusalu mosi ya nene? (Longi, kuwa mabanza ya bana.)

4C Participatio ya bana:

Bana yonso tuba na ritime—Kwenda na Antioshe, Barnabasi!
Sadisa bakristo kuna!

5. Barnabasi sosaka Saule kusadisa yandi na kusalu na Antioshe.

5A Kutanga Bisalu 11:25-26

25 Na nima, Barnabasi kwendaka na bwala Tarse sambu na kusosa Saule.

26 Ntangu yandi monaka yandi, yandi nataka yandi na Antioshe. Mvula mosi ya mvimba, bo vandaka kukutakana na dibundu yina. Bo vandaka kulonga bantu mingi. Bantu ya Antioshe, bo bantu ya ntete na kubinga balonguki ya Yesu Kristo nde « bakristo .»

5B Kuyula bana bonso yai:

Niveau Primaire :

- Barnabasi sosaka nani na bwala Tarse ? (Yandi sosaka Saule.)
- Yandi nataka Saule wapi ? (Na Antioshe)
- Bo zole vandaka kukutakana na dibundu ya Antioshe sambu na kusiamisa bakristo ntangu ikwa ? (Mvula mosi ya mvimba)
- Na Antioshe, bo yantikaka kubinga balandi ya Yesu inki ? (Bakristo)

Niveau Secondaire:

Bantu zole vandaka kusala na kimvuka sambu na kusiamisa bakristo ya Antioshe. Bo nani ? (Barnabasi ti Saule)

Keti bo vandaka kunwana na kati na bo, nani me luta nene ? (Ikele ve. Bo sadilaka Yesu na kintwadi.)

5C Participatio ya bana:

Bana sala théâtre. Muntu mosi sala bonso Saule, muntu mosi Barnabasi. Saule kuvanda mwa-ntama. Barnabasi ke longa yandi mosi na Antioshe. Bana yonso ya nkaka vanda bakristo ya Antioshe. Bo yonso ke yangisa Barnabasi, ke yula yandi bangyifula mingi. Barnabasi bika bo, yandi kwenda kusosa Saule. Saule kuvuta ti yandi ti bo longa bantu sikamosi.

6. Barnabasi ti Saule nata makabu na Yeruzalemi sambu na kusadisa bakristo kuna.

6A Kutanga: *Bisalu 11:28-30*

28 Muntu mosi na kati na bo zina ya Agabusi, telamaka na meso ya bakristo, ebuna yandi zabisaka bo na ngolo ya Mpeve ya Nzambi nde nzala ya nene ta vanda na ntoto ya mvimba. (Mambu yina bwaka na ntangu ya Klode vandaka ntotila ya nene ya Roma.)

29 Bakristo zengaka nde konso muntu, bonso kele kimvwama na yandi, yandi ta tinda lusadisu na bampangi yina ke zingaka na Yudea.

30 Bo salaka mutindu yina, ebuna bo tindaka mbongo na bambuta na Yudea na maboko ya Barnabasi ti Saule.

6B. Kuyula bana bonso yai:

Niveau Primaire :

- Inki mutindu bakristo zabaka nde ntangu ya nzala ta kwisa ? (Profete ya Nzambi zina ya Agabusi songaka bo.)
- Inki ntangu yo salamaka ? (Ntangu Klode vandaka ntotila ya nene ya Roma)
- Bakristo ya Antioshe sadisaka bakristo ya Yudea inki mutindu? (Tindaka mbongo ya offrande)
- Konso mukristo pesaka inki mutindu? (Bonso kimvwama na bo)

- Bo tindaka offrande yina na maboko ya nani? (Barnabasi ti Saule)

Niveau Secondaire:

- ✓ Ntete, dibundu ya Yeruzalemi tindaka Barnabasi sambu na kusadisa bakristo kusiamisa bakristo na Antioshe. Na nima ya ntangu, inki mutindu dibundu ya Antioshe sadisaka diaka bakristo ya Yudea? (Kutinda bo offrande ntangu bo vandaka na mpasi.)
- ✓ Inki sorte ya muntu nge ta tula ntima kunata offrande na bwala ya nkaka? (Longi, kuwa mabanza ya bana.)

6C Participatio ya bana: Mwana mosi vanda Barnabasi. Yandi telema na ntwala ya bana ya nkaka. Bana ya nkaka luta kuna, bo sala bonso bo ke pesa yandi makabu. Bo yonso tuba nde, “Nata yo kusadisa bakristo na Yeruzalemi.”

7. Nzambi bingaka Barnabasi ti Saule kuvanda bamissionaire ya ntete.

7A Kutanga : Bisalu 13:1-4

1 Na dibundu ya Antioshe kuvandaka na baprofete ti balongi, bo yai : Barnabasi, Simeoni (yina ya bo vandaka kubinga mpi Muntu-Ndombe), Lusiusi (muntu ya bwala Sirene), Manaeni (nduku ya ntotila Erode Antipasi,) ti Saule.

2 Kilumbu mosi, ntangu bo vandaka kusamba Mfumu Nzambi ti kubuya kudia mpi sambu na kusamba Yandi, Mpeve ya Nzambi kwisaka kutubila bo nde : « Beno katula Barnabasi ti Saule sambu na kwenda kusala kisalu yina ya mono solaka bo. »

3 Ntangu bo buyaka kudia mpi bo sambaka Nzambi imene, bo tulaka Barnabasi ti Saule maboko, ebuna bo songaka bo na kwenda.

4 Mpeve ya Nzambi tindaka Barnabasi ti Saule sambu na kwenda na bwala Selesia. Kuna bo kotaka na maswa tii na kisanga ya Shipre.

7B Kuyula bana bonso yai :

Niveau Primaire :

- Na dibundu ya Antioshe, bo monaka Barnabasi ti Saule bonso inki ? (Zole na kati ya baprofete ti balongi ya dibundu)
- Ntangu Mpeve ya Nzambi songaka bo kutinda Barnabasi ti Saule kusadila Yesu, bo vandaka na kusala inki? (Kusambu ti kubuya kudia sambu na kusamba)

- Mpeve songaka dibundu nde Barnabasi ti Saule sala inki? (Sala ksalu ya Yandi me sola bo ya kusala)
- Bo salaka inki kusonga nde Barnabasi ti Saule kwendak na kiyeka ya dibundu? (Bo tulaka bo maboko.)
- Bo kwendaka wapi ya ntete ti ya zole? (Ntete bo kwendaka na bwala Selesia ti na nima na kisanga ya Shipre.)

Niveau Secondaire:

- Ntangu yai, Barnabasi ti Saule kumaka inki? (Bamissionaire. Distance bo kwendaka vandaka kiteso ya 274 km, distance ya Kikwit tii Kinshasa, ti ndambu.

8. Barnabasi, Saule ti Yoane-Marko yantikaka ksalu ya Shipre.

8A Kutanga : Bisalu 13:4-8

4 Mpeve ya Nzambi tindaka Barnabasi ti Saule sambu na kwenda na bwala Selesia. Kuna bo kotaka na maswa tii na kisanga ya Shipre.

5 Ntangu bo kumaka na bwala Salamine, yo yantikaka kuzabisa nsangu ya Nzambi na banzo ya bisambu ya Bayuda. Yoane-Marko mpi vandaka ti bo sambu na kusadisa bo.

6 Na nima, ntangu bo lutaka kisanga yina yonso, bo kwisaka kukuma na bwala Pafosi. Kuna bo kwendaka kukuta nganga-ngombo mosi zina na yandi Baryesu; yandi vandaka muyuda, yandi mpi vandaka profete ya luvunu.

7 Yandi vandaka muntu ya Sergiusi Pelusi yina vandaka guverneri ya kisanga yina mpi muntu ya mayele. Sergiusi Paulusi bingaka Barnabasi ti Saule, sambu yandi zolaka kuwa nsangu ya Nzambi.

8 Kansi nganga-ngombo yai Elimasi (yina kele zina na yandi na ndinga ya Kigreki), yandi vandaka kutula ntembe ti bo, sambu yandi vandaka kusosa mpila nde guverneri kubuya malongi na bo yina.

8B Kuyula bana bonso yai:

Niveau Primaire:

- Na Salamine, bo vandaka kulonga ndinga ya Nzambi wapi? (Na banzo ya Nzambi ya Bayuda.)
- Nani diaka kwendaka sambu na kusadisa bo? (Yoane-Marko)
- Na bwala Bafosi, bo zolaka longa ndinga ya Nzambi na nani? (Na guverneri ya sika yina)

- Nani vandaka kunwanisa bo sambu guvernere kuwa ve ndinga yina? (Nganga-ngombe zina ya Elimasi)

Niveau Secondaire:

- Na sika nge ikele, nani keke kunwanisa bo ya longa ndinga ya Nzambi? Bo ke nwanisa bo inki mutindu?

8C Participatio ya bana:

Bana yimba: Guvernere zolaka kuwa, kansi Elymasi zolaka ve, ve, ve.

9. Nzambi sadilaka Saule kukanga munoko ya magician Elymasi, sambu Guvernere kukwikila.

9A Kutanga : *Bisalu 13:9-11*

9 Saule yina ya bo vandaka kubinga mpi Paulo fulukaka na Mpeve ya Nzambi. Yandi talaka nganga-ngombo yina mbote-mbote mpenza,

10 ebuna yandi tubaka na yandi nde : « Nge me fulukaka na mambu ya luvunu, ya mutindu na mutindu ti na mambu ya mbi na mutindu na mutindu. » Nge keke mwana ya Satana, nge keke mbeni ya mambu yonso ya mbote ! Keti nge ta bikisa ve na kubebisa banzila ya Mfumu Nzambi ?

11 Kuwa ntangu yai, Mfumu ke bula nge, meso na nge ta fwa, nge ta monaka diaka ve ntangu tii na ntangu yina ya Nzambi me tula. » Kaka na ntangu yo yina Elimasi yantikaka kumona mwa-mpimpa na meso, ebuna mpimpa ya ngolo bwilaka yandi. Yandi yantikaka kubaluka-baluka ndambu na ndambu sambu na kusosa kana nani lenda kusimba yandi na diboko sambu na kunata yandi.

9B Kuyula bana bonso yai :

Niveau Primaire :

- Bo vandaka kubinga Saule inki diaka ? (Paulo. Yai muntu ya vandaka Ntumwa Paulo.)
- Na ngolo ya Mpeve ya Nzambi, Paulo tubaka inki na nganga-ngombo ? (Nge ta mona diaka ve tii ntangu ya Nzambi me tula.)
- Ndinga yai, yo salamaka inki mutindu ? (Kaka ntangu yo yina yo bwaka. Yandi vandaka kusosa muntu kutwadisa yandi.)

Niveau Secondaire:

- Sambu na inki nge banza Paulo vandaka na mpila kusala kimpa yina na nganga-ngombo? (Sambu ngolo ya Nzambi ikele kuluta ngolo ti ngolo ya Satana.)

9C Participatio ya bana: Bana yonso sala ntete bonso bo keke magician ya lenda mona diaka ve. Na nima, bo sala bonso bo keke guvernere ya me kwikila Yesu.

10. Saule mataka na sika ya ntete, Barnabasi kitaka na sika ya zole.

10A Kuyindula kaka baverse yina diaka

10B Kuyula bana bonso yai:

Niveau Primaire :

- Keti nge banza nde Barnabasi kumonaka kimpala ntangu yandi monaka Nzambi sadila Saule, muntu ya vandaka ntete nsadisi na yandi? (Yandi waka kimpala ve sambu mabanza na yandi vandaka ve kuvanda muntu ya ntete, kansi kaka kusadila Nzambi mpi kupusa kimfumu na Yandi na ntuala.)

Niveau Secondaire :

- Inki mutindu nge banza Barnabasi waka na ntima, ntangu yandi waka Saule tuba na bandinga ya ngolo na Elymasi, magicien ya mbi? (Yandi vandaka na kiese sambu yonso vandaka sambu na Yesu.)
- Na bilumbu ya ntama, mbala kuvandaka nde, Saule vandaka na mfunu ya lusadisu ya Barnabasi kusonga bakristo na Yeruzalemi nde kieleka, yandi me balula ntima. Kansi yo ke monika bonso ntangu me kwisa nde Saule vandaka na mfunu ya lusadisu ya Barnabasi diaka ve. Yo monikaka bonso Saule vandaka me kuma ntwadisi. Sambu na inki nge banza Barnabasi vandaka na kiese kupesa nzila na Paulo? (Sambu mambu ya nene vandaka ve nani kele nene na beto baserviteur. Mambu ya nene vandaka kaka lukumu ya Yesu.)
- Ntangu bo vandaka na Antioshe, Mpeve ya Nzambi me tuba nde, “Tula apart Barnabasi ti Saule. Ntangu ya bo me manisa kosalu na Sipre, Bible tuba, “Paulo ti groupe na yandi” (Bisalu 13:13a). Zina ya Saulo me kuma Paulo, ti Paulo me baka sika ya ntete bonso ntwadisi. Zina ya Barnabasi, bo tanga ve ntangu yina. Yandi kele kaka partie ya “groupe ya Paulo.” Yo ke monika bonso Nzambi vandaka kutuba nde, “Pesa nzila, Barnabasi. Kosalu ya nge bonso ntwadisi me mana. Ntangu yai, nge ta baka sika ya zole. Paulo me kuma ntwadisi ntangu yai.” Kana mambu bonso yai kusalamaka na nge, nge ta vanda na mpila kukanga ntima, kulanda kaka kusadila Yesu kukonda kubokuta ? (Longi, kuwa mvutu ya bana.)

11. Yoane-Marko bikisaka bo ti yandi vutukaka na Antioshe.

11A Kutanga : *Bisalu 13:13*

13 Paulo ti banduku na yandi kotaka na maswa na Pafosi sambu na kwenda na bwala Perga na provense ya Pamfilia, kansi Yoande-Marko bikisaka bo pana, ebuna yandi vutukaka na Yeruzalemi.

11B Kuyula bana :

Niveau Primaire :

- Wapi kele Barnabasi na verse yai ? (Yandi kele na kati ya “banduku na yandi” Paulo. Yandi me baka kisika na nima, kisika ya zole.)
- Inki salamaka kuna? (Yoane-Marko bikisaka bo ti vutukaka na Yeruzalemi.)
- Barnabasi landaka kaka kutambula ti Paulo na babwala mingi. Paulo vandaka ntwadisi ntangu yai. Yandi muntu vandaka kusamuna mingi. Kansi yo pesaka Barnabasi mpasi ve. Keti yandi vandaka na nsoni ve kuvanda nsadisi ya Paulo ? (Ikele ve. Yandi vandaka na kiese sambu yandi bakisaka nde, yina vandaka sika Nzambi me pesa yandi. Kisalu na yandi vandaka kusadisa Paulo. Yandi zabaka nde kisika Nzambi pesa beto kele sika ya kuluta mbote sambu na beto yonso.)

11B Participatio ya bana: Bo yonso tuba “Kwenda mbote” na Yoane-Marko.

12. Paulo (ya vandaka Saule) sonikaka nde, beto yonso ta baka makabu bonso kisalu ya beto me sala.

12A Kutanga : 1 Korinto 3:8,9

8 Muntu yina ke kunaka mbuma ti muntu yina ke losilaka yo masa bo zole kele kiteso mosi. Nzambi ta futa konso muntu bonso kele kiteso ya kisalu yina ya yandi me salaka.

9 Beto ke sadilaka Nzambi na kimvuka, ebuna beno kele kilanga ya Nzambi.

12B Kuyula bana bonso yai :

Niveau Primaire :

- Inki mutindu verse yai ke songa bisalu mutindu na mutindu na bisalu ya Nzambi ? (Bonso na bilanga, muntu mosi losa nkeni na ntoto, ti muntu ya nkaka pesa masa, bonso yo na kimfumu ya Nzambi, bisalu kele mutindu na mutindu. Yonso kele kiteso mosi ve, kansi yonso kele mfunu.)
- Beto ke sadilaka Nzambi inki mutindu? (Na kimvuka. Tii bantu ya nkaka.)

Niveau Secondaire :

- ✓ Nani sonikaka bandinga yai ? (Ntumwa Paulo. Yandi sonikaka mikanda ya 1 ti 2 Korinto.)
- ✓ Inki nge banza? Keti Paulo vandaka kuyindula Barnabasi ntangu yandi sonikaka bandinga yina ? Paulo zabaka nde Barnabasi, ti konso mukristo, ta baka makabu ya Nzambi na mpila ya yandi me vanda kwikama na yina ya Nzambi pesaka yandi kusala.
- ✓ Nzambi pesaka Paulo privilege kusonika mikanda mingi ya Bible, ya Kuwakana ya Mpa. Yandi pesaka ve Barnabasi kisalu yina. Keti Paulo

vandaka na ntima ya lutondo sambu na mpila Barnabasi sadisaka yandi na luyantiku? (Ee, yandi bakisaka nde beto ke sadila Nzambi na kimvuka.

12C Participatio ya bana: Yimba, “Konso muntu / Sala kisalu/ ya Nzambi pesa nge./ Na kiese ! (Repeter)

13. Paulo ti Barnabasi vutukaka na Antioshe.

13A Kutanga : Bisalu 14:25-28

25 Bo kwendaka kuzabisa nsangu ya Nzambi na bwala Perga. Bo kwendaka mpi na bwala Atalia.

26 Katuka kuna bo kwendaka na Antioshe na maswa. Bantu ya Antioshe bo bantu tubilaka bo nde, “Nzambi kukeba beno kaka mutindu yandi ke zolaka beno, sambu na kusala kisalu yina ya beno fweti sala.” Kisalu yina bo vandaka me lungisa yo ntangu bo kwisaka kuvutuka na Antioshe.

27 Ntangu bo kwisaka kukuma na Antioshe, bo bingaka bantu yonso ya dibundu, ebuna bo zabisaka bo mambu yonso ya Nzambi salaka ti bo ti nki mutindu yandi kangulaka nzila na bantu yina vandaka Bayuda ve nde bo mpi kukwikila.

28 Bo vandaka kuna bilumbu mingi ti bakristo.

13C Kuyula bana bonso yai:

Niveau Primaire :

- Songa bisika zole bo longaka nsangu ya Yesu. (Perga ti Atalia.)
- Bo vutukaka wapi na maswa ? (Na Antioshe, sika bo me yantika voyage)
- Bo salaka inki na Antioshe? (Bo bingaka dibundu ti bo pesaka rapport inki Nzambi me sala.)
- Inki mambu ya mpa me salama na voyage na bo? (Nzambi kangulaka ntima ya bantu ya vandaka Bayuda ve sambu bo mpi kukwikila.)

Niveau Secondaire :

- ✓ Keti nge ke na kiese kupesa rapport na mpila nge me sadila Nzambi ?

14. Paulo ti Barnabasi wakanaka ve na makambu ya Yoane-Marko, ebuna bo kabanaka, ti Barnabasi bakaka Yoane-Marko bonso partenaire na kisalu ya Nzambi.

14A Kutanga : Bisalu 15:36-40

36 Na nima ya bilumbu fioti, Paulo tubilaka Barnabasi nde : « Beto vutuka sambu na kwenda kutala bampangi ya Dibundu yina kele na babwala yonso yina ya beto vandaka kwenda kuzabisa nsangu ya Mfumu Nzambi, mpidina beto ta zaba kana bo me kuma nki mutindu. »

37 Barnabasi zolaka nde bo nata mpi Yoane yina ya bo vandaka kubinga mpi Marko.

38 Kansi Paulo buyaka nde : « Mbote ve na kunata yandi, sambu yandi bikisaka beto na Pamfilia, yandi kwendaka diaka ve kusala ti beto nzila mosi. »

39 Ntembe ya ngolo vandaka na kati na bo. Yo yina, bo kabanaka. Barnabasi nataka Marko, ebuna bo kwendaka na maswa na kisanga ya Shipre.

40 Kansi Paulo solaka Silasi, ebuna ntangu yandi zolaka kwenda, bampangi ya dibundu tubilaka Paulo nde, “Mfumu Nzambi kukeba nge kaka mutindu Yandi ke zolaka nge.” Ebuna yandi kwendaka.

14B Kuyula bana:

Niveau Primaire:

- Paulo ti Barnabasi wakanaka ve na inki ? (Paulo zolaka kunata Yoane-Marko na voyage na nima kutala diaka bampangi, kansi Barnabasi ndimaka ve, sambu Marko vutukaka na voyage ya ntete ti landaka ve kumanisa ti bo.)
- Inki vandaka nsuka ya mambu yina? Bo kabanaka. Paulo kwenda ti Yoane-Marko ti Barnabasi kwendaka ti Silasi. Bo yonso zole landaka kusadila Nzambi.

14C Participatio ya bana:

Bana sala théâtre ya mambu yai. Na nsuka, Paulo kwenda na Silasi ti Barnabasi kwenda na Yoane-Marko.

15. Nzambi sadilaka Paulo ti Yoane-Marko kusonika mikanda ya Bible.

Na bilumbu na nima, Nzambi sadilaka Yoane-Marko kusonika Nsangu ya Mbote ya Marko na Bible na beto. Yandi mpe sadilaka Paulo kusonika 13 to 14* mikanda ya Kuwakana ya Mpa. (* 14 Kana Paulo sonikaka Bahebreu ti 13 kana muntu ya nkaka sonikaka yo.) Kansi Nzambi sadilaka ve Barnabasi kusonika ata kitini ya Bible.

- Inki mutindu nge banza Barnabasi monaka sambu na success ya bantu yai zole Yoane-Marko ti Paulo? (Longi, kuwa mabanza ya bana. Mono banza yandi vandaka kaka na kiese na yo sambu ntima ti kisalu na yandi vandaka yina ya nsadisa, nkwa-encouragement. Kisalu na yandi vandaka kupusa bantu ya nkaka sambu bo lungisa lukanu yonso ya Nzambi sambu na bo.)

Kumanisa:

Barnabasi pesaka nzila na Paulo sambu makabu na yandi vandaka encouragement ya bantu ya nkaka.

Ntete, Barnabasi pesaka nzila sambu Paulo baka sika ya ntete. Na nima, yandi pesaka nzila sambu Yoane-Marko kubaka sika ya ntete. Ata bantu ya nkaka lenda

mona nde sika ya zole keke mbote mingi ve, yo vandaka sika ya kuluta mbote sambu na Barnabasi—sambu yina vandaka sika Nzambi lenda sadila yandi kuluta mbote. Yina vandaka sika Nzambi pesaka yandi.

Application—Devoir sambu na mwana ya me guluka:

Bu nge ke songa Nsangu ya Yesu, yo keke Nzambi Yandi mosi ya sadisa bantu kundima nde yo keke kieleka. Ebuna, yo keke mambu ve kana nge baka “sika ya ntete” to “sika ya zole”, to “sika ya nkaka.” Konso sika ya nge ke na yo keke mbote, kana yina keke sika Nzambi zola nge kuvanda. Na lukanu ya Nzambi, konso muntu keke special, keke mfunu. Nge ta baka makabu ya Nzambi bonso kwikama ya nge na ksalu Nzambi peska nge, ata ksalu yina ke monika nene to fioti na meso ya bantu.

Muntu yai Barnabasi, Nwka-Encouragement, vandaka na makasi ve ntangu bantu ya nkaka lutaka yandi. Yandi monaka kimpala ve. Yandi vandaka kuna kaka sambu na kuencourager Paulo ti sambu na kusadisa yandi. Barnabasi vandaka ve kusosa sika ya ntete, sika ya lukumu. Yandi vandaka kusosa sika ya Nzambi zolaka kusadila yandi.

Keti Nzambi me pesa nge sika ya nkaka, kansi nge zola kuvanda na sika ya ntete? (*Kinga sambu bana vutula mvutu to yindula.*) Nge lenda mona sambu na inki Nzambi me tula nge na sika ya zole?

Keti nge me mona mpasi bonso Lali na histoire ya beto tubaka na luyantiku ya lesu? Ketu nge me bambuka nde Nzambi keke na lukanu sambu na nge?

Mbala ya nkaka nge keke na leki to mbuta ya sala kuluta mbote na classe, ata nge longuka na ngolo ya nge yonso. Mbala ya nkaka nge mona nde muntu ya nkaka baka atasio kuluta nge na ecole to na dibundu to na fami. Mbala ya nkaka, nge lenda vanda na sika ya zole, ata nge me sala na ngolo na nge yonso. Inki nge lenda bambuka na moment yina? (Reviser verse ya kulonguka, I Korinto 3:8-9.)

Nge keke mfunu mingi na Nzambi. Yandi keke na lukanu ya mbote sambu na luzingu ya konso mukristo. Mbala ya nkaka, Nzambi me sala nge ve sambu na kutwadisa, kansi sambu na kuencourager ti kusadisa bantu ya nkaka.

Beno bakristo, mono ke pesa beno devoir yai : Mposo yai, meka vanda bonso Barnabasi. Tula ngolo kuvanda kiese na sika Nzambi pesa nge. Nzambi ta pesa nge makabu kana nge sala na kwikama yonso yina ya Yandi pesa nge na kusala.

Kubinga na Yesu sambu na bana ya me guluka ntete ve:

Kansi mbala ya nkaka nge me zaba ve nde nge me yamba Yesu bonso Mvulusi. Nge fweti yamba Yandi na ntwala nge lenda sadila Yandi. Yandi zola nge kubalula ntima, ti tula kivuvu kaka na Yandi. Ndinga ya Nzambi sila nde, “Konso muntu ya ta binga zina ya Mfumu, yandi ta guluka” (Roma 10:13). Kana nge zola kuyamba Yandi bubuyai, nge lenda.

(Binga bana kundima Yesu kana bo me ndima Yandi ntete ve. Lomba bo kusonga decision na bo na mosi ya bampila yai: kutelema, kubikala ntangu bantu ya nkaka kubasika, kukangula meso ti kutala nge na ntangu ya bisambu, kunangula diboko, to kutana ti nge na nima ya classe. Manisa na lombilu. Na nima ya classe, solula ti samba ti bo ya zola ndima Yesu.)

===

NSUKA YA LESO ECODIM

===

*Paulo sonikaka mikanda 13—Roma, 1 & 2 Korinto, Galates, Efezo, Filipi, Kolosse, 1 & 2 Tesalonika, 1 & 2 Timothée, Titus, Philemon. Bantu ya nkaka kwilika yandi mpi sonikaka Ba-Hebreu. Kana mpidina, yandi sonikaka mikanda 14.



Paulo ti Barnabasi kwenda na voyage missionere